

Headlines

1. लैफ्टिनेंट गवर्नर मनोज सिन्हा होरें डिप्टी कमीशनरें ते SSPएं दी बैठक लाइयें प्रदेश च नशे दी कबैतु खलाफ- दना बर्दाश्त नैई करने आली नीति अपनाने दा आहवान कीता ऐ।
2. केन्द्र सरकारें आखेआ ऐ जे पिच्छले 5एं बरे दे दरान जम्मू-कश्मीर च 68 जहार किलोग्राम नशीले पदार्थ जब्त कीते गे न।
3. मुखमंत्री उमर अब्दुल्ला होरें आखेआ ऐ जे सरकार मरहलेवार ढंगगै नै ध्याड़ीदारें गी पक्का करने लेई वचने बज्झी दी ऐ।
4. NHPC दियें परियोजनाएं गी जम्मू-कश्मीर गी मुंतकिल करने सरबन्धी प्रस्ताऽ विधानसभा दे अज्जै दे एजेंडे च सूचिबद्ध ऐ।
5. ते जम्मू-कश्मीर दे इलैक्शन कमीशनर होरें पंचैत मतदाता सूचियें दी नज़रसानी दा जायजा लैता ते 100 फीसद योग्य मतदाताएं दे नांऽ दर्ज करने दा लक्ष्य मुकरर कीता ऐ।

<><><><><><>

LG-Drug Menace

लैफ्टिनेंट गवर्नर मनोज सिन्हा होरें जम्मू -कश्मीर च नशे दी कबैतु गी दना बर्दाश्त नैई करने दी नीति अपनाने दे निर्देश दिते न। ओह कल लोकभवन जम्मू च डिप्टी कमीशनरें- SSPएं ते सिविल ते पुलस प्रशासन दे सीनियर ऐहलकारें दी इक उच्ची सतह दी बैठक दी प्रधानता करा'रदे हे। एल.जी होरें प्रदेश गी नशीले पदार्थ यानि ड्रग्स शा मुक्त बनाने लेई बहु-उद्देश्यी नीति अपनांदे होई नशीले पदार्थ दी तस्करी आले नैटवर्कें गी तबाह करने- लोकें गी इस भेठा जागरुक बनाने लेई बड्डे स्तर पर अभियान चलाने ते नशे दी लत दे शकार लोकें दे इलाज सनें उनें'गी सलाह-मशवरे ते आबादकारी दी सुविधा उपलब्ध करोआने दी जरुरतें पर जोर पाया। श्री सिन्हा होरें भलेआं हेठली सतह उप्पर खूफिया जानकारीयां कठेरने ते नशा-तस्करें खलाफ संगठित ते सख्त कार्रवाई दे बी निर्देश दिते। मुख सचिव अटल डुल्लु- जम्मू-कश्मीर पुलसा दे सदर DGP नलिन प्रभात ते होर दुए आला अफसरें बी बैठका च हिस्सा लैता।

<><><><><><>

Narcotics Seizure

नशे दे गैर -कनूनी कारोबार खलाफ बड्डी कामयाबी दे तैहत कनून नाफज़ करने आली एजेंसिएं जम्मू-कश्मीर च पिच्छले 5एं बरे दे दरान 68 जहार 62 किलोग्राम नशीले पदार्थ ज़ब्त कीत ना। इन्नी भारी मात्रा च होई दी एह बरामदगी खिते च नशा तस्कर नैटवर्क दे पैमाने ते इन्दी नकेल कस्सने लेई सरबंधत एजेंसिएं पास्सेआ चलाए जा'रदे अभियाने पर बी लोs पांटी ऐ। जम्मू-कश्मीर च नशीले पदार्थे दी लत दे सर्वेक्षण ते ज़बती दे सरबंधे च नैशनल कांफ्रेंस दे सांसद चौधरी मोहम्मद रमज़ान हुंदे आसेआ पुच्छे गेदे सोआला दा परता दिंदे होई समाजी न्याs ते सशक्तिकरण मंत्रालय आसेआ एह जानकारी सांझी कीती गई ऐ।



LG-SKUAST -J

लैफ्टिनेंट गवर्नर मनोज सिन्हा होंरे कल इक उच्ची सतह दी बैठक लाइयै प्रदेश च सबूते पर आधारित नीति बनाने ते राई-बाई दे खेतर च टिकाऊ बदलावे लेई स्कास्ट जम्मू ते International Food Policy Research Institute- IFPRI बश्कार सामरिक साथ-सहयोग पर चर्चा कीती। एल.जी सिन्हा होंरे IFPRI दे कन्नै प्रस्तावित सैहयोग दा सुआगत कीता ते आखेआ जे उंदी वैश्विक म्हारथ दे कन्नै खिते च संस्थागत समर्थ गी तगड़ा बनाने च बड़ी मदाद हासल होग। बैठक दरान IFPRI दे सैहयोग कन्नै स्कास्ट जम्मू च खाद्य नीति ते डेटा विश्लेषण आला इक उत्कृष्टता केन्द्र खडेरने बारे चर्चा कीती गई।



CM- Regularization (Byte)

जम्मू-कश्मीर च ध्याड़ीदारें गी पक्का करने दी सरकार दी वचनबद्धता गी फही पक्का करदे होई मुखमंत्री उमर अब्दुल्ला होंरे विधानसभा गी जानकारी दिती जे मजूदा माली बरे दे दरान मरहलेवार ढंगगै कन्नै एह प्रक्रिया शुरु कीती जाहग। विधायक मुहम्मद युसुफ तारीगामी हुंदे आसेया ध्याड़ीदारें गी पक्का करने दी मंग आले प्राईवेट मैम्बर बिल पर परता दिंदे होई उमर होंरे आखेआ जे बिल च जेहड़ा बी मसला पुट्टेआ गेआ ऐ ओह बिल्कुल बी गलत नैई ऐ।

मुख्यमंत्री हों आखेआ जे ओह ध्याड़ीदारें गी पक्का करने सरबन्धी प्रस्तावित विधेयक दे पिच्छे दी मंशा दा बरोध नई करदे न पर उ'नें इसी पेश कीते जाने दे समें गी लेइयै अपने ऐतराज व्यक्त कीते न। उ'नें आखेआ.....(बाईट)

<><><><><><>

CM-Doc Pvt. Practice (Byte)

मुख्यमंत्री उमर अब्दुल्ला हों आखेआ ऐ जे सरकारी डाक्टरें दी प्राइवेट प्रैक्टिस पर रोक लाने लेई असरदार हीले कीते जा'रदे न। जम्मू-कश्मीर विधानसभा च प्राइवेट मैम्बरें दे बिल पर प्रतिक्रिया दिंदे होई मुख्यमंत्री हों आखेआ जे बिल च जेहड़ी बी मंग पुट्टी गेदी ऐ ओह बिल्कुल बी गलत नई ऐ। उ'नें आखेआ जे एह माड़ा चलन पूरे जम्मू-कश्मीर च फैली गेदा ऐ। उमर हों आखेआ जे पैहलकी सरकारें आसेआ बी इस माड़े चलन पर रोक लाने आस्तै समें-समें पर हुक्म रसाल कीते गेदे न- पर इंदी अमलावरी कदें बी स्हेई ढंगै सिर नई होई सकी ऐ। उमर हों आखेआ.....(बाईट)

<><><><><><>

ते हुंन बाकि दिएं खबरें कन्नै पवन वर्मा:-

<><><><><><>

NHPC Projects

National Hydroelectric Power Cooperation (NHPC) दी स्वामित्व आहली परियोजनाएं गी केन्द्र शासत प्रदेश सरकार गी मुंतकिल करने दी मंग करने आहला इक मता जरूरी प्रस्ताव अज्ज विधान सभा च पेश कीता जा'रदा ऐ। आकाशवाणी जम्मू दे संवाददाता दी रिपोर्ट मुजब NC दे विधायक सजाद शाहीन हुंदे आसेआ पेश कीते गेदे इस प्रस्ताव गी अज्जै लेई सदन दे कम्में दी सूची च शामिल कीता गेआ ऐ। एह मतदान दे राएं चुने गेदे 7 प्रस्तावें च शामिल ऐ। अज्ज कारवाई दरान इस प्रस्ताव उप्पर चर्चा होने दी मेद ऐ।

<><><><><><>

SEC Pyt Electoral Rolls

जम्मू-कश्मीर दे राज्य दे चुनांस आयुक्त शांतमनु होरें कल पंचैत मतदाता सूची 2026 च जारी संशोधन दी समीक्षा लेई इक बैठक सददी। परतियै नरिक्षण करने आहली एह प्रक्रिया 27 मार्च 2026 गी मतदाता सूची दे मसौदे जारी करने कन्नै शुरु कीती गई ही- जेहदे च पूरे केन्द्र शासित प्रदेश च मतदाताएं दे नमें नामांकन बारे नांस हटाने जां स्थानांतरण कराने बारे दावें ते ऐतराज लेई आमंत्रत कीता गेआ हा। SEC नै Field Staff आसेआ घरें-घरें च Outreach उप्पर जोर दिता तांजे एह यकीनी बनाया जाई सकै जे इक अप्रैल 2026 दी Cutt Off तरीक तक्कर 18एं बरे दे सारें योग्य मतदाताएं गी पंचैत मतदाता सूची च दाखल कीता जा। दावे ते ऐतराज दर्ज करने दी अखीरी तरीक 29 अप्रैल 2026 निर्धारत कीती गई ऐ।

<><><><><><>

Satish –Sports

खेड्ड मंत्री सतीश शर्मा होरें कल युवा सेवाएं ते खेड्ड मैहकमें दे कम्मकाज दी समीक्षा कीती- जेहदे च मते जरूरी प्रशासनिक ते मानव संसाधन सरबंधी मुद्दें उप्पर ध्यान दिता गेआ। इस समीक्षा दा मकसद पूरे जम्मू-कश्मीर च खेड्डें ते युवाएं दी भागीदारी दे पूरे-पराते विकास लेई इक रणनीतिक रोड मैप तयार करना हा। मंत्री होरें मुख चनौतियें बारे चर्चा कीती ते खेड्डें दे बुनियादी ढांचे गी बधाने- युवाएं दी भागीदारी गी बढ़ावा देने ते मैहकमे दे संचालन गी सुचारु बनाने लेई आखेआ। उंनै युवा प्रतिभागियें गी खिते च खेड्डें गी प्रोत्साहित करने लेई नमें तरीकें दी लोड़ उप्पर जोर दिता। उंनै लम्मी अवधि थमां लंबत मनुकखी संसाधन सरबंधी मुद्दें दी बी समीक्षा कीती।

<><><><><><>

Hanuman Jayanti

हनुमान जयंति पूरे देसै दे बक्ख-बक्ख हिस्सें आंगर जम्मू क्षेत्र च बी बड़े उत्साह ते भक्तिभाव कन्नै मनाई जा'रदी ऐ। इस दिन भगवान हनुमान जी दा जन्म होआ हा। जम्मू च लोकें बड्डलै हनुमान मंदर जाईए पूजा-अर्चना कीती। परानी मंडी ते मोती बजार दे प्राचीन हनुमान मंदरें च भक्तें दी भारी भीड़ दिक्खने गी लब्बी। हनुमान जयंति दे मौके पर मंदरें च हनुमान चालीसा- सुंदर कांड ते रामायन पाठ कीता जा करदा ऐ।

<><><><><><>

Drug Control Dept. Ramban (Byte)

रामबन च नशा नियंत्रण मैहकमे ने जिला प्रशासन कन्ने रलियै युवाएं गी नशे थमां दूर रक्खने लई “नशा मुक्त भारत अभियान” तैहत तौले गै खेड्ड गतिविधियें दा आयोजन करने जा’रदा ऐ। इनें गतिविधियें दा समर्थन जिला प्रशासन आसेआ कीता जंदा ऐ- जेहदा मकसद खेड्डे गी समाजी बुराइयें खलाफ इस्तेमाल करने लेई कीता जंदा ऐ। इस बारे होर मती जानकारी दिंदे होई रामबन दे Assistant Controller Drug- Sanjeev Kumar Gupta होरें आखेआ,.....(बाईट)

<><><><><><>